

Henny Eman

Descansando den su rancho riba cunuco, pero activo ainda 'tras di e telon' den politica, Henny Eman a rebiba partido AVP na aña 1978, ora cu el a tuma mando di e partido over. El a hib'e partido na un renacimiento y crecimiento impresionante te pa bira Prome Minister di pais Aruba den su prome añanan di status aparte. Na aña 2001, el a anuncia su retiro y habri caminda pa hobennan tuma over e partido. Sr.Robertico Croes a tuma e partido over y Sr.Henny Eman a retira pa un bida mas trankil. Meymey di su cunuco di plantacion nos a pone sinta 'riba e stul'.

F: Dicon Henny Eman a retira diripiente asina for di politica?

HE: No, e tabata planea pa basta tempo di antemano. Mi a sinti cu mi a logra tur loke mi kier a logra pa nos pais y mi inspiracion no tabata mes grandi mas. Mi a mira cu tabatin hende capaz pa tuma nos puesto, den persona di Sr.Tico Croes den partido, pues e momento tabata propicio.

F: Kico a pasa anto cu Tico Croes como lider di AVP?

HE: Tico Croes ta un hende sumamente bon prepara, un lider di nacimiento y un bon amigo. Si el a haya e chens lo e tabatin hopi di duna su pais. E idea tabata pa na momento cu e bira lider, Sr.Watty Vos (q.e.p.d) lo mester a apoye y ami lo a keda yuda, pero ora Watty a fayece, tur cos a cambia. Corda cu Tico tabata Minister pa casi 8 aña caba, pues ocupando e puesto di menos popular den finanza, el a haya un sla a base di esey y su caracter a duna cu, e mes kier a carga e consecuencia.

F: Awendia hopi ta bisa cu e AVP y MEP ta mescos, bo ta sinti cu tin diferencia grandi entre e partidonan?
HE: : E diferencia ta fundamental, mep ta adhoc, nan ta 'hold office' esey

kiermen cu nan ta warda hende subi trapi bin cerca nan, nan no tin vision, nan no tin plan, nan no tin principio; avp al contrario tin un programa cu kier logra, tin vision, tin un ideologia, ta prepara pa 'tackle' cualkier reto. Nos ta studia y reuni, trece e mihor ideanan hunto, consulta nos profesionalnan, riba tal y tal topico kico nos ta bay haci, con nos ta solucioná cualkier problema, prome cu gobernación y durante.

F: Henny a yega di haci un favor politico?

HE: Si; bo por hayabo den un situación cu tin motibonan asina fuerte, cu apesar cu un persona pa ley no tin e derecho, bo tin cu haci excepcion y hacie. Ehempel ta dia Betico Croes (q.e.p.d) a haya e accidente grave, mi mester a firma pa e por a haya transportación y tratamiento medico urgente pa e por a bay Merca mesora. E tempo ey no tabatin AZV. Si bo tin un caracter integro, bo por diferencia entre un situación urgente y un abuso di e privilegio di bo poder.

F: Cua ta e tres logronan di mas grandi di Henny su gobierno?

HE: Uno, ta nos estructura estatal, ta pesey mi a dreña política, pasobra

tabatin hopi grito na fabor di independencia y ami a mira cu mantencion di status aparte tabata e caminda correcto. Dos, introduccion di AZV, poco pais na mundo tin un seguro general medico, y awor bo no ta depende di carchi docter of un favor politico pa bo haya bo salud. Tres, pa e satisfaccion emocional tabata redobla e pensioen, nos contrincantenan tabata masha contra, pero a base di estudio nos a mira e necesidad y e hecho cu por. Mi tin hopi mas cu mi por menciona na nivel di enseñanza, nos a habri nos schoolnan bek, tur estudiante tin derecho riba estudio avanza, antes e tabata a base di fabor politico. Enseñanza pa empleo, Aruba Investment Bank y asina mi por sigui.

F: Bo opinion despues di e sentencia di huez den bo caso?

HE: Hopi aliviá, nan a acusa nos di fraude, ladronicia, un cantidad di cos y huez a bari tur for di mesa. E unico cos cu a keda ta un 'mogelijke begrotings overscheiding', cu ta un ley cu nos mes a introduci. Si bo aplica e ley estrictamente, lo bo hayabo cu tur minister sin excepcion lo tin cu bay dilanti mesa berde. Mi ta contento cu Tico su caso tambe a keda bari for di mesa, pues gastamento di pueblo su placa

pa persigui hende cu no a haci nada contra ley, ban spera a stop.

F: Con bo ta mira comportacion di parlamentario y ministernan awendia?

HE: Mi lo no mester a forza ningun hende pa sali di partido, nan mes lo a tuma honor na nan mes y lo a retira. Den avp esnan cu t'ey di e lider bin abou ta den politica pa motibo di un ideal, un vision, un principio y nan comportacion mester ta ehemplar.

F: Traha c'un partido politico chikito tabata un problema?

HE: Tabata hopi dificil den nos tempo, pasobra e partido ey no tabatin un programa, nan no tabatin vision y tabata traha adhoc, esey a hiba na hopi discusion y mi mester puntra mi mes si tabata bale la pena pa sigui. Mi mester a djis check si nos a cumpli cu nos vision, si ta si, nos ta tuma e decision.

F: Nos mester paga e debe na Italia (Sace)?

HE: Si Nel tabatin e curashi di yamami na telefon, lo mi a bise di e palabracion cu mi tin cu e Minister President di Hulanda y esey ta cu nos no mester paga nada! Paga 100 miyon? Locura.

F: Berdad Henny ta planta den cunuco?

HE: Pakico no, el a bira un hobby dushi. ■

